

Канон Святому Иоанну Предте

Молитвами святых отец наших, Господи Иисусе Христе Боже наш, помилуй нас. Аминь.

Трисвятое. Пресвятая Троице: Слава, и ныне: Отче наш: Господи, помилуй. (12 раз.) Слава, и ныне: Приидите, поклонимся (Трижды.) Псалом 50.

КАНОН, глас 2-й

Песнь 1

Ирмос: Во глубине постла иногда фараонитское всевоинство преоруженная сила, воплощенное же Слово всезлобный грех потребило есть: препрославленный Господь, славно бо прославися.

Прпев: Святыи великий Иоанне, Предтече Господень, моли Бога о нас.

Крестителю и Предтече Христов, погружаемый всегда сластями телесными ум мой управи, и волны страстей укроти: яко да в тишине Божественней быв, песнословлю тя.

Святыи великий Иоанне, Предтече Господень, моли Бога о нас.

Недоуменным просветився просвещением, яко многосветлая звезда, мысленному Востоку предтекл еси, Имже озарится сердцу моему, Крестителю, моли, омраченному всеми бесовскими приложениями.

Слава: В реце бездну иногда, всеумудре, погрузил еси, потоп содевающую благодатию, всего преступления. Но молюся, потоки, блаженне, моих прегрешений изсуши, Божественным ходатайством твоим.

И ныне: Чистыя Девы, Бога воплотившия, сродник был еси, блаженне Предтече, с Неюже ты чтим и молим, иже в Божественном храме твоём ныне живуще, храмы и нас сотвори Духа Святаго.

Песнь 3

Ирмос: На камени мя веры утвердив, расширил еси уста моя на враги моя, возвесели бо ся дух мой, вегда пети: несть свят, якоже Бог наш, и несть праведен паче Тебе, Господи.

Святыи великий Иоанне, Предтече Господень, моли Бога о нас.

Исцели струпы души моея, и ум мой, омраченный небрежением, озари Божественным твоим ходатайством, Господень Предтече, и всякаго избави мя сопротивнаго обстояния, молюся.

Святыи великий Иоанне, Предтече Господень, моли Бога о нас.

Неплодствие разрешил еси рождшия, родився Божиим промышлением, премудре пророче: неплодное убо сердце мое плодоносно ныне соделай, Господень Предтече, ходатайством твоим, добродетелей приноси прозябения.

Слава: Любовию твоею создающаго Божественный дом, вышняго жития улучшить моли; и иже верою храму твоему служащия, храмы Духа Божественнаго сотвори, Крестителю и Предтече, ходатайствы твоими.

И ныне: Веселяшеся Предтеча в ложеснах носим матерних, и покланяшеся Господу, носиму в ложеснах Твоих, Благодатная, Егоже моли от всякия скорби избавити мя.

Господи, помилуй. (Трижды.)

Седален, глас 2-й

Благоутробия ради милости, Блаже, спасти Твое создание, Христе, пришел еси, преклонь Небеса схождением Твоим. Темже страшное смотрение Твое поюще вопием Ти: мольбами Предтечи Твоего, очищение грехов подаждь нам, яко Един благоутробен.

Слава, и ныне: *Богородичен:*

Предстательнице теплая христианом, Сыну Твоему молися присно, Богородице, всякаго злодейства и огорчения избавити нас борца, и дати нам прощение, в нихже согрешихом, за милосердие щедрот, Твоими молитвами, Мати Дево.

Песнь 4

Ирмос: Пришел еси от Девы, не ходатай, ни Ангел, но Сам Господи, воплощся, и спасл еси всего мя человека. Тем зову Ти: слава силе Твоей, Господи.

Святы́й великий Иоанне, Предтече Господень, моли Бога о нас.

Преклоншему небеса, и человеком беседовавшу, главу преклонил еси десницею твоею, пребогате: еюже мя соблюди, во смирении сохраняя сердце мое.

Святы́й великий Иоанне, Предтече Господень, моли Бога о нас.

Пустыня тебе гражданина непроходная имяше, блаженне Предтече, темже вопию ти: пусту всякаго Божественнаго деяния бывшу душу мою, плодоносну сотвори.

Святы́й великий Иоанне, Предтече Господень, моли Бога о нас.

Закон Божественный управляя, беззаконно заклан был еси. Темже молюся тебе: беззаконнующа мя всегда и прельщаема бесовскими прельщеньми, исправи.

Слава: Создав себе храм Владыце Царю, к Божественным селением ныне пришел еси, Предтече: яже получитьи моли, тебе пресвяты́й дом Воздвигшаго.

И ныне: Призри на мя недугующаго, Всенепорочная, и разреши страсти моя лютыя и неудобь исцельныя, яко да величаю Тя, возвеличившую все человечество.

Песнь 5

Ирмос: Просвещение во тме лежащих, спасение отчаянных, Христе Спасе мой, к Тебе утренюю, Царю мира, просвети мя сиянием Твоим: иного бо разве Тебе Бога не знаю.

Святы́й великий Иоанне, Предтече Господень, моли Бога о нас.

В течении Иорданских струй нетления, Предтече, крестив Христа, моли истекания страстей моих изсушити, и потоки сладостных наследовати, и праведных красная радования.

Святыи великий Иоанне, Предтече Господень, моли Бога о нас.

Уже рыдаю, и содрогаюся страхом, и недоумением всегда содержим есмь, помышляя моя соделанная, и будущий Суд ужасный: благоутробне Господи, пощади мя Твоего Крестителя мольбами.

Святыи великий Иоанне, Предтече Господень, моли Бога о нас.

Законополагаяи людем спасение, Предтече, в раскаянии прегрешений бывшее, посреде закона и благодати стал еси. Сего ради молим тя, образи покаяния нас просвети.

Слава: Дажь ми время покаяния, унынно прешедшее все иждившему, Благодетелю, имея на сие молящаго Тя, Слове, Иоанна великаго Предтечу, и покаяния всемирнаго проповедника.

И ныне: Наветы и ловлении льстиваго умертвихся, Владычице Всенепорочная, оживи мя, яже рождающая Живот всех, Богородице, ипостасный, да Тя пою благочестно Всенепорочную.

Песнь 6

Ирмос: В бездне греховней валяясь, неизследную милосердия Твоего призываю бездну: от тли, Боже, мя возведи.

Святыи великий Иоанне, Предтече Господень, моли Бога о нас.

Глас Слова проповедавый, всех гласы восприем, проси, грехов прощение даровати верою поющим тя.

Святыи великий Иоанне, Предтече Господень, моли Бога о нас.

Сокрушение души моя исцели, и грехов бремя разреши, и паче надежды спаси мя молитвами твоими, блаженне Предтече.

Слава: Иисуса, Егоже рукою твоею крестил еси, Предтече, моли, руки греха избавити мя, взимающа к Нему руце присно, всеславне.

И ныне: Дреманием леностным одержим есмь, сон греховный тяготит сердце мое: Твоим Печистая. пленным холатайством. возлвигни и спаси мя.

Господи, помилуй. (Трижды.) Слава, и ныне:

Кондак, глас 3-й

Прежде неплоды, днесь Христова Предтечу раждает, и той есть исполнение всякаго пророчества: Егоже бо пророцы проповедаша, на Сего во Иордане руку положив, явися Божия Слова пророк, проповедник, вкупе и Предтеча.

Икос

Восхвалим ныне Господня Предтечу, егоже священнику Елисавет роди из ложесн неплодных, но не без семене: Христос бо един вместилище пройде непроходимо без семене, Иоанна неплоды роди, без мужа же сего не роди: Иисуса же, осенением Отца и Духа Божия, Дева роди чистая. Но Безсеменному явися от неплодове пророк, проповедник, вкупе и Предтеча.

Песнь 7

Ирмос: Богопротивное веление беззаконнующаго мучителя высок пламень вознесло есть: Христос же простре богочестивым отроком росу духовную, сый благословен и препрославлен.

Святыи великий Иоанне, Предтече Господень, моли Бога о нас.

Из корене секирою твоего покаяния исторг язвы страстнаго сердца моего, всади, Предтече, Божественное безстрастие и страх чистейший Божий, всякия злобы отчуждающий мя.

Святыи великий Иоанне, Предтече Господень, моли Бога о нас.

Во струях Иорданских яко крестил еси покрывающаго водами превыспренняя Господа, Того моли воду даровати Божественнаго умиления присно очима моима, славный Предтече.

Слава: Иже миру вземлющаго грех, Агнца Божия, Предтече, проповедав, Того моли, от козлиц части явити мя чужда, и десным Его овцам и мене сочетати, славне.

И ныне: неплодная утроба носяше Тя, Дево, во чреве носившую Слово воплощенно: Егоже Божественными възгрании великий Предтеча, неплодная

всесвяты́й плод, позна радуяся, и поклонися.

Песнь 8

Ирмос: Пещь иногда огненная в Вавилоне действия разделяше, Божиим велением халдеи опаляющая, верныя же орошающая, поющия: благословите, вся дела Господня, Господа.

Святы́й великий Иоанне, Предтече Господень, моли Бога о нас.

Даждь десницу мне, на земли лежащему, Предтече, иже десницу простер, омыл еси водами Несквернаго: и избави мя скверны телесныя, всего мя очищая покаянием, и спаси мя.

Святы́й великий Иоанне, Предтече Господень, моли Бога о нас.

Имущи, душе, время покаяться, лености тяжчайший сон оттряси, и спешно побди, вопиющи Владыце твоему: Милосерде, ущедри мя, Крестителя Твоего мольбами.

Святы́й великий Иоанне, Предтече Господень, моли Бога о нас.

Потоцы страстей и воды злобы до души моея внидоша: блаженне Предтече, потщися скоро изъяти мя, иже речными струями измыл еси безстрастия тишайшую пучину.

Слава: Увы мне, многа зла сотворшему: увы мне, единому прогневавшему Бога Преплагаго! Крестителю Христов, помози ми, и подаждь прегрешений моих разрешение, и долгов моих отсечение, ходатайствы Твоими.

И ныне: Вышняго Бога плотию рождшая, от гноя мя возстави страстей оскорбляющих мя: и люте всего обнищавша, Божественными обогати, Пречистая, добродетельми, яко да воспою Тя спасаем.

Песнь 9

Ирмос: Безначальна Родителя Сын, Бог и Господь, воплощся от Девы нам явися, омраченная просветити, собрати расточенная: тем Всепетую Богородицу величаем.

Святы́й великий Иоанне, Предтече Господень, моли Бога о нас.

Кала мя избави греховнаго, Господи, Безгрешне Едине и Многомилостиве,

Крестителя мольбами, иже Тебе проповеда всему миру, Агнца Божия, вземлющаго человеков грехи.

Святы́й великий Иоанне, Предтече Господень, моли Бога о нас.

Яко шипок благовонен, яко благоуханный кипарис, яко неувядаемый крин, яко миро честно имейя тя, Господень Предтече, моих дел злосмрадия избавляюся молитвами твоими, притекая к покрову твоему.

Святы́й великий Иоанне, Предтече Господень, моли Бога о нас.

Неплодствовати мя неплодными делы, всеблаженне, сотвори, добродетелей благоплодие присно приносяща, чадо мя Господне творя, и причастника Божественному Царствию, и святых собору купножителя.

Слава: Нам любящим тя, и любовию почитающим, и в Божественном храме твоём ликующим, даждь с небесе разрешение лютых, Предтече Господень, и жития исправление, и прегрешений избавление.

И ныне: Носиму во утробе Богоматерни, вся Носящему манием, поклонился еси, Пророче: с Неюже моли смиренней спастися души моей, во многая впадающей по вся дни согрешения.

Молитва ко святому Иоанну Предтече

Крестителю Христов, проповедниче покаяния, кающагося не презри мене, но совокупляяся с вои небесными, молися ко Владыце за мене недостойнаго, унылаго, немощнаго и печальнаго, во многая беды впадшаго, утружденнаго бурными помыслы ума моего: аз бо есмь вертеп злых дел, отнюд не имейя конца греховному обычаю; пригвожден бо есть ум мой земным вещем: что сотворю, не вем. И к кому прибегну, да спасена будет душа моя; токмо к тебе, святы́й Иоанне, благодати тезоимените, яко ты пред Господем по Богородице вем больша быти рожденных всех: ибо ты сподобился еси коснуться верху Царя Христа, вземлющаго грехи мира, Агнца Божия: Егоже моли за грешную мою душу, да поне отныне, и в первыйнадесять час, понесу тяготу благую и прииму мзду с последними. Ей, Крестителю Христов, честный Предтече, крайний пророче, первый во благодати мучениче, постников и пустынников наставниче, чистоты учителю и ближний друже Христов, тя молю, к тебе прибегаю: не отрини мене от твоего заступления, но возстави мя падшагося многими грехи: обнови душу мою покаянием, яко вторым крещением, понеже обоего начальник еси: крещением омываяй прародительный грех, покаянием же очищаяй

коегождо дело скверно: очисти мя, грехами оскверненного, и понуди внити, а може ничтоже скверно входит, во Царствие Небесное. Аминь.

Достойно есть яко воистину блажити Тя Богородицу, Присноблаженную и Пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем.*(Поклон)*

Слава, и ныне: Господи, помилуй. *(Трижды.)* Господи, благослови.

Господи, Иисусе Христе, Сыне Божий, молитвами Пречистыя Твоя Матере, святого великаго Предтечи и Крестителя Иоанна и всех святых помилуй и спаси нас, яко Благ и Человеколюбец. Аминь.

Полный текст этих молитв см. в разделе «Молитвы утренние»